

## 第 16 回世界漢詩同好會

### 『迎年所感』

韓國編（ 10 人 13 首）

（一）作者： 省軒 朴海椿

宇內波翻拂旭天，白頭相見又新年。  
豐徵臘雪陽和動，燦煥朝暎瑞彩鮮。  
物外逍遙今世樂，吟邊交契夙生緣。  
南窓忽得傳春信，欲返梅魂舊態然。

（二）作者： 一平 趙南權

公道居諸似不然，我年今至八旬年。  
生當暗澹乾坤裏，老去炎涼世態邊。  
往迹難言成事一，前程又欲作心千。  
最高所願人皆正，天下熙熙共樂天。

（三）作者： 霞山 李鍾福

今宵始覺又新年，掛壁青燈隻影遷。  
頭上只添羈旅雪，眼中尚帶鷺鷗緣。  
飽經愛惡耽何物，順應乾坤究濁賢。  
歲換襟懷常濩落，莊周胡蝶一夢前。

（四）作者： 清溪 趙冕熙

節序循環無後先，何言送歲又迎年。  
堯階莫葉知盈仄，舜典璿璣定反旋。  
臘酒屠蘇瘟疫却，春王正月聖賢傳。  
遠連李杜吾詩會，廣播東西結好緣。

又

移寓王城五十年，盧生枕上不醒眠。  
龍鍾豈戀功名迹，鴻爪空留翰墨緣。  
岐路楊朱殊可歎，歸田陶潛亦堪憐。  
齒當先聖從心欲，不脫塵埃事事牽。

（五）作者： 葛亭 權宰興

日月輪環痕莫天 世人何故每添年  
雪寒窮臘方過後 風暖新春即到前  
隔面親朋傳賀牒 遠邦騷客詠詩箋  
輒藏狗尾豚頭出 但願全球共活平

又

送歲又迎年 感興正莫邊  
夢豚云吉兆 祥慶幾多傳

(六) 作者：雲溪 趙昌來

鍊丹難得學飛僊，霜鬢爭添又一年。  
塵累積來重世債，文思老去伴閑緣。  
青山默默古今色，綠水淙淙昏曉涓。  
有限人生無限惱，聊吟送舊迎新篇。

(七) 作者：柏村 權奇甲

莊周枕上又經年，三百六旬塵事緣。  
何苦行程千里駕，惟歡酒賦五湖船。  
去歲未乘楊邑鶴，今晨始彈舜宮絃。  
無關甲子薰風足，於我優期樂自然。

(八) 作者：一愚 李忠九

(1)

舊莫盡落新莫出，事事新新興百千。  
開曆早爲春計劃，三元旭日在東天。

(2)

在澗學人初志堅，讀書三昧一心專。  
歲寒松柏秀冬嶺，霜雪不侵能獨全。

(九) 作者：屈漁堂

生平滿百不多年，臘去元來感自鮮。  
遲暮寓居蓴菜戀，歸期未定一其愆。

(十) 作者：孤芳 李勝九

(於 美國 New York)

霜雪乾坤梅藥先，却疑青帝逆行天。  
佳人莫道新情重，征路遙遙故舊憐。